

Inatsisissatut siunnersuummut nassuiaatit

**Nassuiaatit nalinginnaasut**

1. Inatsisissatut siunnersuutip tunuliaqutaa

Akileraaruserinermik ingerlatsineq pillugu inatsisartut inatsisissaattut siunnersuutip (UKA 2006/29) 2006-imi ukiakkut ataatsimiinnermi Inatsisartunit oqaluuserineqarnerani ilaatigut Atassutip oqaaseqartuata siunnersuutigaa siunnersuutip kalaallisuuani taaguut "Skatterådi" nutarterneqartariaqannginnersoq.

Maannamut Skatterådimut taaguutigittinneqartup taartissaanik kalaallisut taaguuserneqarnissaanik Atassutip siunnersuutaa Inatsisartut Akileraartarnermut Akitsuusiisarnermullu Ataatsimiititaliaata ilalerlugu iluarinartippaa.

Siunnersuutip aappassaaneerineqarnerani oqaatigineqartutut Naalakkersuisut isumaqataapput kalaallisut Skatterådimik taagorneqarnera nalitsinnut naleqqutinngitsoq. Peqatigitillugu Naalakkersuisut neriorsuutigaat Oqaasileriffik erseqqinnerusumik oqaloqatigeriarlugu Skatterådip kalaallisut taaguutissaanik imaqartumik allannguutissatut siunnersuummik saqqummiussinissartik.

2. Inatsisissatut siunnersuutip imarisaa

Siunnersuutigineqarpoq taaguut "Skatterådi" inatsisip kalaallisuuani tamarmi "Akilerarusiinernik aalajangiisartut"-nik taarserneqassasoq.

3. Aningaasaqarnikkut allaffissornikkullu pisortanut sunniutissat

Aningaasaqarnikkut allaffissornikkullu siunnersuutip pisortanut taasarialinnik sunniuteqarnissaa naatsorsuutigineqanngilaq.

4. Aningaasaqarnikkut allaffissornikkullu inuussutissarsiuteqartunut sunniutissat

Aningaasaqarnikkut allaffissornikkullu siunnersuut inuussutissarsiuteqartunut sunniuteqassasorineqanngilaq.

5. Avatangiisinut pinngortitamullu sunniutissat

Siunnersuut avatangiisinut pinngortitamulluunniit sunniutissaqanngilaq.

6. Innuttaasunut allaffissornikkut sunniutissat

Siunnersuut innuttaasunut allaffissornikkut sunniutissaqanngilaq.

7. Naalagaaffeqatigiinnermut namminersornermullu tunngasut

Siunnersuut naalagaaffeqatigiinnermut namminersulernissamulluunniit tunngasunik imaqanngilaq.

8. Pisortatut oqartussaasunik kattuffinnillu tusarniaaneq

Siunnersuutip siunnersuutigineqarnermisut teknikkikkut attuumassuteqarnera eqqarsaatigalugu tusarniaassutigineqarsimannngilaq.

**Aalajangersakkanut ataasiakkaanut nassuiaatit**

*§ 1-imut*

Nr. 1-imut

Siunnersuutigineqarpoq kalaallisut taaguut "Skatterådi" inatsimmi tamarmi allangortinneqassasoq uunga "Akileraarusiinernik aalajangiisartut".

*§ 2-mut*

Siunnersuutigineqarpoq inatsit atortuulissasoq ulloq 1. juli 2007.